

# DIOFISIRI TSA BOLAODI BA THEPA MEEDING DI KGAOLETSA DITHETHEFATSI TSA BOLENG BA R12 MILLION MANE ORTIA

**Pretoria, Labohlano, 14 Phuptjane 2019** – Diofisiri tsa Bolaodi ba Meedi di kgaoleditse dithethefatsi tsa boleng bo kopanetsweng bo ka bang R12 million diketsahalong tse tharo tse fapaneng mane Boemafofaneng ba Matjhaba ba Oliver Tambo (ORTIA).

Ka Laboraro, 12 Phuptjane 2019, Diofisiri tsa Bolaodi ba Meedi di kgaoleditse mopalami wa monna a leka ho mokola *heroin* ya boima bo fetang 3 kg, ya boleng bo akantsweng ba R9,2 million, ho tswa ka naha.

Mopalami enwa o ile a emiswa le ho hlongwa dipotso ke diofisiri tsa Bolaodi ba Meedi ka nako eo a neng a kena sefofaneng se neng se leba Europe. O ile a koptjwa ho tsamaya le bona ho ya sebakeng se hlwailweng moo a ileng a koptjwa ho bula mekotlana ya hae, eo a neng a se a nyehelane ka yona e ileng ya busetswa morao. Mekotlana ena e ile ya phenywa ka hloko sebakeng sa Bolaodi ba Meedi sa ho setjha dithoto.

Sehlopha sa Bolaodi ba Meedi se ile sa fumana tse patilweng ka hara mekotlana ya maiketsetso ka hara mekotla ena, mme sena ho fumanwe e le *heroin*. Monna enwa o ile a tshwarwa ke ditho tsa Ditshebeletso tsa Sepolesa sa Afrika Borwa (CAS 106/06/2019).

Ketsahalong e nngwe, diofisiri tsa Bolaodi ba Meedi di ile tsa hapa morwalo o ileng wa fihla Johannesburg ho hlaha Lagos ka la 13 Phuptjane, ho latela lesedi le fumanweng ho tswa yuniting ya Bohlwela ba tsa Bonokwane ya Ditshebeletso tsa Sepolesa sa Afrika Borwa (SAPS CI).

Ka nako ya tekolo, le ka thuso ya dintja tse fofonelang, ho ile ha fumanwa dipakana tse nne tse neng di kentse *ephedrine (crystal meth)* ya boima ba 4 kg ya boleng ba mebileng ba R2,2 million. Dipakana tsena di ile tsa fetisetswa ho Bolaodi ba Diphuputso tsa Bonokwane ba Mantlha tsa SAPS (Hawks).

Phasela ya *ephedrine* ya boleng ba R630 000 le yona e ile ya fumanwa Mail Centre hona mane ORTIA. Phasela ena, ya boima ba 2,8 kg, e tla nyehelwa Sepoleseng hore ho tle ho etswe diphuputso tse fetang mona.

SARS e bile le katleho ena ka lebaka la tshebedisano le yuniti ya Bohlwela ba tsa Bonokwane ya SAPS mmoho le mafapha a mang a amehang.